

Morning Dogri (NSD) National News Bulletin 15-10-2024

आकाशवाणी

1. प्रधानमंत्री नरेन्द्र मोदी होर अज्ज नमीं दिल्ली च विश्व दूरसंचार मानक सम्मेलन ते इंडिया मोबाइल कांग्रेस दे 8में संस्करण दा भारत मंडपम च उद्घाटन करंगन।
2. जम्मू कश्मीर दे उपराज्यपाल मनोज सिन्हा होरें नैशनल कांग्रेस दे लीडर उमर अब्दुल्ला होरें गी नमीं सरकार बनाने दा साददा दित्ता ऐ।
3. भारत नै कनाडा दे उच्चायुक्त सनें 6 कनाडाई राजनियकें गी बर्खास्त करी दित्ता ऐ।
4. विदेश मंत्री डॉ. एस.जयशंकर होर शंघाई सैहयोग संगठन दे शिखर सम्मेलन च हिस्सा लैने लेई अज्ज पाकिस्तान जांगन।
5. हवा दे म्यार दे प्रबंधन सरबंधी आयोग नै राश्ट्रीय राजधानी क्षेत्र च ग्रेडिड रिस्पांस एक्शन प्लान दे पैहले गेड़ गी लागू कीता ऐ।
6. महिलाएं दे टी-20 विश्व कप च न्यूजीलैंड नै पाकिस्तान गी 54 रंजे कन्नै हराई दित्ता।

<><><><><><>

PM-ITU

प्रधानमंत्री नरेन्द्र मोदी होर अज्ज बडलै नमीं दिल्ली दे भारत मंडपम च अंतराश्ट्रीय दूर संचार संघ आईटीयू दे विश्व दूरसंचार मानक सम्मेलन डब्ल्यू.टी.एस.ए-2024 ते इंडिया मोबाइल कांग्रेस दे 8में संस्करण दा उद्घाटन करंगन। विश्व दूर संचार मानक सम्मेलन संयुक्त राश्ट्र डिजीटल प्राद्योगिकी अजेसी दे अंतराश्ट्रीय दूर संचार संघ दे मानक कन्नै सरबंधी सम्मेलन ऐ जेहदा सरिस्ता चऊं-चऊं ब'रे परैत कीता जंदा ऐ। आईटीयू दे इतिहास च एह पैहली बारी ऐ जे एहदा सरिस्ता भारत ते एशिया प्रशांत क्षेत्र च कीता जा'रदा ऐ। एह कुल संसारी सतह दा इक महत्वपूर्ण कार्यक्रम ऐ जेहड़ा दूर संचार डिजीटल टेक्नालोजी ते आईटीयू क्षेत्रें दी अगुवाई करने आले 190 कोला मते मुख्यें दे त्रै जहार कोला मते उद्योगपतिएं, नीति निर्माताएं ते तकनीकी माहिरें गी इक्कै मंच पर आन्नोग।

<><><><><><><>

LG-New Govt.

जम्मू कश्मीर दे उपराज्यपाल मनोज सिन्हा होरें केन्द्र शासत प्रदेश च नमीं सरकार बनाने लेई नैशनल कांफ्रेंस दे नेता उमर अब्दुल्ला होरें गी साददा दित्ता ऐ। मनोज सिन्हा होरें गी नैशनल कांफ्रेंस दी तरफा दित्ती गेदी इक चिट्ठी च आखेआ गेआ हा जे उमर अब्दुल्ला होरें गी आम सैहमति कन्नै विधानमंडल पार्टी दा नेता चुनी लैता गेआ ऐ। एहदे बाद उपराज्यपाल होरें उनेंगी मुख्मन्त्री दे रूपै च सगंध चुक्कनले दा साददा दित्ता ऐ। उपराज्यपाल हुंदे संदेश दूत नै कल उमर अब्दुल्ला होरें गी चिट्ठी सौंपी ते उनेंगी शपथ ग्रैहण समारोह दी तरीक ते समें बारे जानकारी दित्ती। शपथ ग्रैहण समारोह कल बडलै श्रीनगर च आयोजित कीता जाग।

<><><><><><><>

Harayana

हरियाणा दी नमीं सरकार शपथ ग्रैहण समारोह 17 अक्तूबर गी पंचकुला च होग। समारोह च प्रधानमंत्री नरेन्द्र मोदी होर बी शामिल होंगन। राष्ट्रीय महा सचिव तरुण चुग होरें हरियाणा च चीह बारी बीजेपी दी सरकार बनने क्षेय हरियाणा वासिएं ते प्रधानमंत्री हुंदी नीतिएं गी दित्ता ऐ। उनें गलाया जे प्रधानमंत्री होरें गरीबें, करसानें, नोजवानें ते महिलाएं दे विकास लेई सशक्त नीतियां बनाइयां न।

<><><><><><><>

Prez. Murmu

राष्ट्रपति द्रौपदी मुर्मू होरें भारत ते अल्जीरिया बश्कार गैहरे आर्थिक सैहयोग दा आह्वान कीता ऐ। अल्जीरिया दी राजधानी अल्जीयस च अल्जीरिया भारत आर्थिक मंच गी संबोधत करदे होई राष्ट्रपति होरें दौनें मुख्में बश्कार सांझ भेयाली गी होर निग्गर बनाने ते साथ सैहयोग दे इक नमें युग दी दिशा च नमीं रफतार देने दी जरूरतै पर जोर दित्ता ऐ। राष्ट्रपति मुर्मू होर अल्जीरिया, मॉरीटानिया ते मलावी त्रऊं देशें दे दौरे पर न। दौरे दे दुए गेड़ च ओह कल मॉरीटानिया रवाना होंगन।

<><><><><><><><>

India Canada

भारत नै कनाडा दे कार्यवाहक उच्चायुक्त स्टीवर्ट रोस व्हीलर सनें 6 राजनियकें गी इत्थुआं चली जाने लेई आखेआ ऐ। उप-उच्चायुक्त पेटरिक हेबर्ट प्रिमि सचिव मैरी केथरीन जोली, इआन रांस, डेविड द्राइटसी, एडम जेम्स चुइपका ते पाउला ओर जुएला होरें गी बर्खास्त करी दित्ता गेआ ऐ। इनें राजनयिकें गी 19 अक्टूबर जां ओहदे शो पैहले भारत छोड़ने गी आखेआ गेआ ऐ। भारत नै कनाडा च अपने उच्चायुक्त ते होर दुए राजनयिकें ते अधिकारिएं गी वापस सददने दा फैसला कीता ऐ। सरकार नै गलाया ऐ जे भारत गी अपने राजनयिकें दी सुरक्षा करने दी कनाडा सरकार दी प्रतिबद्धता उप्पर कोई भरोसा नेई ऐ। इस दरान कनाडा दे प्रभारी डी.फेयर गी कल संजा नमीं दिल्ली च विदेश मंत्रालय च सददेआ गेदा हा। उनेंगी दस्सेआ गेआ जे कनाडा च भारतीय उच्चायुक्त ते होर दुए राजनयिकें ते अधिकारिएं गी नशाना बनाना कुसा कीमत उप्पर बर्दाश्त नेई कीता जाग। तोआई भारत सरकार नै कनाडा च भारतीय उच्चायुक्त ते किश दुए राजनयिकें दे जांच दे दायरे च होने दे कनाडा सरकार दे दावें गी पूरी चाल्ली खारज करी दित्ता ऐ। विदेश मंत्रालय बी इसी बेबुनियाद आरोप दस्सेआ ऐ। मंत्रालय नै गलाया ऐ जे एह कनाडा दी ट्रूडो सरकार दी वोट बैंक दी राजनीति दा हिस्सा ऐ।

<><><><><><><><>

Home Minister

केन्द्री गृहमंत्री अमित शाह होर अज्ज नमीं दिल्ली च भारतीय पुलस सेवा आईपीएस दे प्रोवेशनरें कन्ने गल्लबात करगंन। इस मौके प्रोवेशनर-अधिकारी गृह मंत्री हुंदे कन्ने अपनी सिखलाई दे तर्जुबे सांझे करगंन ते अंदरूनी सुरक्षा कन्ने जुड़ी दिएं चुनौतिएं कन्ने निबड़ने लेई गृहमंत्री हुंदे कोला मार्गदर्शन हासल करगंन।

<><><><><><><><>

Jaishankar-SCO

विदेश मंत्री डॉ. एस.जयशंकर होरें शंघाई सैहयोग संगठन एससीओ शिखर सम्मेलन च हिस्सा लैने लेई अज्ज दऊं दिनें दी यात्रा पर इस्लामाबाद जा करदे न। जिसलै 9 ब'रे च

<><><><><><>

Women T-20

आईसीसी महिला टी-20 क्रिकेट विश्व कप च न्यूजीलैंड नै जंदी रातीं दुबई अंतराश्ट्रीय क्रिकेट स्टेडियम च पाकिस्तान गी 54 रंजें कन्नै हराई दित्ता। इस जित्त दे कन्नै गै न्यूजीलैंड ग्रुप-ए चा सैमीफाइनल च पुज्जने आली दूर्ई टीम बनी गई ऐ। कल्लै दे मैच च पैहले बल्लेबाजी करदे होई न्यूजीलैंड नै 20 ओवरें च 6 विकटें दे नुक्सान पर 110 रंज बनाए। जित्ते लेई लोडचदे 111 रंज दे लक्ष्य दा पिच्छा करदे होई पाकिस्तान दी पूरी टीम 11 ओवर ते 4 गेंदां खेडियै 56 रंज पर ऑल आउट होई गई। एह्दे कन्नै गै भारतीय टीम इस प्रतियोगिता चा बाहर होई गई। भारत दऊं मैव जित्तियै ते दऊं मैच हारियै ते कुल 4 अंक हासल करियै ग्रुप-ए च त्रीए थाहरे पर आई गेआ ते प्रतियोगिता चा बाहर होई गेआ ऐ।

<><><><><><>